



KOPI PAHIT

Orang-orang Indonesia di luar negeri sibuk garuk kepala disebabkan di Indonesia keadaan sulit sedang Presidennya makan angin menjajah ke seluruh dunia.

“Bagaimana bung, negara dalam begitu sulit –
– Presiden makan angin” – kata mereka. Orang-orang ini lupa sekarang kan di Indonesia sudah berbalik kepada dasar 1945 ertinya presiden berkuasa penuh – apa dia mau buat – boleh buat, persetan sama rakyat aku senang jadilah! Hai! Hai!

* * *

PAS banyak menerima kekalahan di dalam pilihanraya negeri-negeri (*State*) di Persekutuan Tanah Melayu. Seseorang pemimpin PAS menyatakan sekalipun PAS kalah tetapi Islam masih tetap menuju kemenangannya kerana mereka terus berjuang! Kalah bung memang sudah kalah, tidak guna lagi diperkatakan kekalahan itu. Sebaliknya, di dalam hal ini bekerja mencari apa kesalahannya maka kalah – kalau sudah dapat diperbaiki¹ dan perjuangkan terus – ini lebih baik daripada menyedap-nyedapkan hati bung!

* * *

Haji Ahmad Maliki bilang kalau PAS menang potong tangan dan hukum rejam dijalankan, yang ertinya orang-orang Melayu akan berkurangan di Persekutuan ini. Terlalu Bung Haji! Hukum Allah hendak dipermain-mainkan dijadikan perbalahan siasah! Hukum potong tangan dan rejam, hukum dari Tuhan yang mesti dijalankan kalau cukup syarat-syaratnya – dan kalau Bung Haji Ahmad

Maliki tak mau terima hukum dari Tuhan, ertinya hukum Islam, keluar sahaja dari Islam kan lebih baik, Bung Haji, buang nama Islam ganti dengan Ah Chong habis perkara! Bagaimana Bung Haji??!!

* * *

Tuan Haji Wanjor bin Abu Bakar, khabarnya dengan anjuran beberapa orang “rakan-rakannya” telah jaya dilantik menjadi Ketua Dewan Ulama PAS Singapura. Orang-orang yang mengenal Tuan Haji itu khabarnya hanya mengangkat bahu. Mereka berkata kalau Tuan Wanjor jadi Ketua Dewan Ulama “sudahlah – selamat PAS!”

* * *

Tuan Haji Hassan Yunus, Ketua Perikatan Johor, pada masa adanya Persatuan Melayu Johor dahulu dikatakan telah menangis apabila kesal terhadap hapusnya hak-hak orang-orang Melayu dan hak-hak Johor di dalam Malayan Union. Ia menangis kerana kesal Sultan Johor menandatangani Malayan Union tetapi kata sebahagian orang, sekarang beliau tertawa apabila apabila² di Johor diperlembagakan bahawa Menteri Besar diluluskan kepada bangsa-bangsa lain. Dengan ini orang hanya berkata *Lā hawla wa lā quwwata illā billāh* sahaja bung! Begitu kalau orang lagi hidup di dalam dunia.

* * *

“Panglima Jihad” PAS bertanding di Perak – lawannya wanita – dan kesudahan pertandingan itu “Panglima Jihad” kalah. Wah kata orang bagaimana seorang panglima jihad kalah bertanding dengan wanita. Untuk menyedapkan hati ada orang menjawab selalu benar panglima-panglima kalah disebabkan oleh wanita – semuanya jadi lemah kalau bertemu wanita – kalau tak percaya tanya sama –

Cemeti al-Farouk

¹ Kesalahan teks. Sepatutnya diperbaiki.

¹ Pengulangan mengikut teks asal.